

L'taiyou d'pierres.

E s' seuvniait d'ces lôvrées tiaind qu' son grant-père raicontait qu'èl était paitchi d'aivô brâment de dgens di paiyis. Quéll' aivisâle de fô èls aivînt aivu d'breûlaie quasi tos yôs bacus en bôs d'vaint d' paitchi po s' l'aincie dains lai grante aivventure. Djainqu'è Ajen, vés lai Gaironne, qu'èls étînt aivus! Els aivînt fotu ènne trifouyie és Romains, èls les aivînt meinme fait è péssaie dôs l' djoug. Pe, mâ d' lai grie di paiyis, èls étînt r'venis dains l' Jura laivou que c'ment des beûjons, ès r'trovainnent yôs breûlées mâjons.

E n'aivait p' aivu taint d' tchaince, lu qu' s'était âchi aivu baître. Mains, â moins, è n'aivait p' breûlè son bacu d'vaint d' paitchi. Aittirie poi lai douçou d' lai vétçhaince dains l' vèjîn paiyis, èl était paitchi d'aivô ènne airmée de totes souêches de dgens qu'è n' cognéçait p', vés l' Sud. Mains ç'ti côp, Jules Cesar les aivait t'nis en réchpèt d'vaint d' les chmèllaie vés Bibracte. Dains lai triquèe, èl aivait r'ci in tâ côp qu'èl était tchoé en lai renvache d'aivô ènne écraimeutchie l'épale. E r'voyait encoé d'vaint lu ci romain soudaît qu' yevait dj' son saibre po l' tchvaie, tiaind qu'è y' breûyé: « Ch' te piaît, muse te en mai manman! ». L' romain soudaît compregné l' mot «mamma », r'béché son aime, gremoinné âtçhe dains son laitîn, pe pèssé outre en l' léchaint sains y' faire pus d' mâ.

L' soi, tiaind qu'è s' ât poéyu r'yevaie, è r'trové d'ses compaignons qu'brâment étînt s'vent bîn pus émeutlès qu' lu, qu' s'étînt poéyu sâvaie. Ensoinne, èls étînt r'venis â paiyis laivou qu'è r'trové les sîns

Sai rontue épale s'était r'botée taint bîn qu' mâ. Elle yi bèyait mitnaint in coérbe djèt. C'ât po çoli qu'an l'aipp'lont l' Coérbat. E s'était bîn s'vent musè en ces mâjons en pierres des v'laidges qu'èls aivînt traivoéchies. An n'coégnéçait p' çoli, dains l' Jura.

In bé djoué, è s' boté dains lai tête de faire ènne mâjon en pierres. Tot d'côte d' son bacu, chus in échpèce de ran, è rôté lai tiere djainqu'en lai roétche. Pe d'aivô ènne preusse, èl airraitché d' pâjaints roétchèts.

E les fayait mitnaint taiyie en mollons po les meu poéyait entéchie. E n'aivait djemaîs fait çoli. E pregné ç'tu qu'yi sannait l' pus bé, l' tenié bîn è piait chus ses dg'nonyes. A premie côp d' maitché, l' roétchèt s'écatch'çhé en tçhaiyeus. El en pregné in âtre, le r'viré dains totes les sens. E bèyé poétchaint in côp d' maitché bîn â moitan, mains l'roétchèt s'égrené en p'tés moéchés. El épreuvé brâment d' djoués encoé. E n'y eut bîntôt pus qu'in meurdgie d' pierres d'vaint lu. Tot tiaimu, è ravoétait, les dous d'ries roétchèts qu'yi d'moérînt, tiaind qu'èl ôyé breûyie: « Ave mamma! ».

E se r'viré, pe voyé drie lu l' soudaît qu'y' aivait léchie lai sâv' vie â béche di crâs d' Bibracte. C'ât qu' les romains soudaîts étînt v'nis otiupaie l' paiyis. Les dous l'hannes s' friainnent ch'les épales en bredoéyaint âtçhe tchètçhun dains sai landye. Beûyaint l' tchaintie di Coérbat, l' Romain y'vé les brais â cie en s'êcâçhaint pe en ch'couyaint lai tête de drète è gâtche. Lu coégnéçait lai taiye d' lai pierre. E pregné l' maitché, l' viré dains totes les sens,pe y'vé les épales. L' maitché n' daivait p' être définmeu.

E pregné yun des roétchèts chus ses dg'nonyes, boté son nèz d'tchus c'ment po l' feûnaie. L' Coérbat l' feûné âchi mains n' senté ran. L' Romain yi pregné l' doigt pe l'boté chus sai tempye, viré lai tête de drète è gâtche, pe tchaimpé l' roétchèt. E raiméssé in ch'cond roétchèt. Ses l'eûyes r'yuînt. E l'viré chus ses dg'nonyes, pe pregniaint lai main di Coérbat, è lai pèssé pus d'in côp ch' lai pierre, aidé en lai meinme piaice. E bèyé des p'tés côps d' maitché tot l' long de ç'te laingne d'vaint d'bèyie in pus fouê côp bîn â moitan. Miraîche, lai pierre s' fenjé en dous moéchés bîn piains. Pe, en ran d' temps, è taiyé tchètçhun des dous moéchés en bés mollons qu'è boté d'ènne sen. E poétché l'roétchèt qu'èl aivait tchaimpé chus l' meurdgie, bèyé in grôs côp d' maitché d'tchus. Lai pierre s'égaiglé en mille moéchés!

Nôs dous l'hannes d'girvoégnainnent ène boussée en djâsaint dains yôs doues landyes. L' Coérbat moinné l' Romain tchie lu, pe y' bèyé di citre. L' Cassius f'sé in peut moère, mains boiyé tot d'meinme d'vaint de r'paitchi.

Les dous l'hannes s'étint poéyu compâre. Les djoués qu'cheûyainnent, l' Coérbat aivait r'tirie des pieres, les aivait yées en dous téches. Enne s'nainne pus taid, l' Cassius r'vegnié. El aivait aippoétché in maitché qu'è bèyé â Coérbat. C'tu-ci allé tch'ri ène pierre d' sai boinne téche. E lai ravoété bîn, lai r'viré d'vaint d' lai bîn botaie è piait chus ses dg'nonyes. Pe è pèssé sai main l' long d'enne laingne.

« Non » qu'dié l'Romain, en traîçaint ène âtre laingne. Note Coérbat dépiaicé sai pierre chus ses dg'nonyes, pe frié tot bal'ment tot l' long de ç'te novèlle laingne. Pe, aiprés qu'èl eut raivoétié l' signe d' lai tête di Romain, è frié in pus foûe côp bîn â moitan. Lai pierre s' fenjé en dous bés moéchés.

E rëcmencé d'aivô ène âtre roétche sains l'ède di Romain. C'ti côp, ç'feut bon di premie côp. Tiaind qu'è tchaimpé l' trâjieme roétchèt chus l' meurdgie, l'Cassius dié: « Ita, ... ». Es yéjainnent ensoinne totes les pieres, pe l' soudaît r'paitché.

Les dous l'hannes finéchainnent poi dev'ni d'bons l'aimis. L' Coérbat aivait aippris è fini les mollons, mains è saivait âchi, mitnaint, quéques mots d' laifin! C'ât ensoinne, qu' nôs dous l'aimis mâj'nainnent ène belle mâjon d'aivô des mûes tot en pieres, ç'mentées poi d' lai maîne. Tiaind qu' l'hôtâ feut fini, an botont in saip'nat ch' le toit, poch' qu'an n'aivait p' de laurie dains l' Jura. Pe, an f'sont ène fête è tot r'vachaie djainqu'â maitin. L' Cassius aivait fait aippoétchaie in grôs véché d'vin qu' les Romains trîmbâlînt aidé d'aivô yos. An maindgeont quaitre poûessèyês, nian p' des poûes. An boiyont, an tchaintont, an dainsont. Tot l' monde aippiâdgéché tiaint qu'le Cassius dié dains lai landye di payis: « Qu' vétieuche le bé Jura! ». Les pus djûenes des afaints s'endremainnent tiand qu' le Coérbat ècmencé sai raiconte: « E y' è ène grante boussée, tiand qu'mon grant-père paitché ... ». En sondge, ès voiyint les Romains qu' pèssint dôs l' djoug drassie poi nos dgens di Jura. Es n' poéyint p' d'vinaie qu'yote p'tét càre de tiere vétch'rait di temps d' pus cintche siecles, taint d'aitieuds è d' hèy'rous djoués!

J-M. Moine

